

Fragmenta, quæ in fine operis post alios con-  
gessi, minus severe tractavi; quippe quæ e scriptorum  
omnigenarum citationibus erant eruenda, ubi omnia  
incerta, ne dicam corruptelis scatentia, videbantur.  
In hac parte operis plurima, quæ vel correxi vel  
non correxi, erunt ignoscenda.

Doctorum virorum, qui ante me in Æschylo  
illustrando optime et felicissime operam præstite-  
runt, libere usus sum laboribus; quos inter insigni  
laude memorandus est recentissimus Editor, Wellau-  
erus, cui quantum debuerit Æschylus, quantum ipse  
debeam, non opus est prædicare.

Valeas jam, Lector, et fruaris ÆSCHYLO.

*Dabam Cantabrigiæ,  
Pridie Cal. Febr. 1828.*